



雙紅堂
小說
100



科 1984



舊小說

已集清

東城雜記

厲鶚

沈正叔

沈大亨。字正叔。號樟亭。宅在清泰門。宋學士文通之後。少爲諸生。博極羣書。善尺牘。百函可立待。而不善舉場之文。以故艱於遇合。中歲遊京師。時華亭徐文貞枋國。知正叔才。欲留撰青詞。積資可得中舍。正叔曰。吾得曳裾王門可耳。安能鬱鬱久居此。遂入賞得楚府典寶。正昭王雅志典墳。接遇賢士大夫。盡禮。正叔輔導之功居多。昭王春秋漸高。艱於子。一日引正叔至密地。指太史公書某傳謂之曰。若堪屬此乎。正叔遷延引避。叩首曰。殿下年力方茂。錫麟非遠。臣實愚頑。不敢奉教。昭王咨嗟太息。愈欽重焉。其守正如此。子宜先字。尚行號芝陽。爲人情至。哀樂過人。長女爲馮太史開之繼室。太史時未遇。食貧不能納禮。尚行開甥館居之。父子墓石俱太史所撰文也。

前生社公

秀水沈孝廉(德符)景倩。敝帚軒刺語云。虞德園吏部。曾爲予言。記得前生爲張秋近河孺間土神。人民稀少。香火蕭條。偶無聊。策杖散步。至閘上。見津吏奔走。冠蓋如雲。急偵之。乃一吏部郎經過也。因心豔之。旋謁上帝。大被噴責。云汝且遷冥中要秩。急羨此塵世熱官。遂令生凡間。俾如所願。時虞清望素著。且夕將出山矣。余心念曰。所言若信。其兆不佳。以社公而爲銓部。前生所望已酬。恐名位止此矣。其後啓事屢證。竟老林壑。果如所卜。

談虎

僧定因

趙彪詔

李安溪說。泉州僧定因。膂力絕人。精少林拳棍。弟子習其伎者。數百人。每有遠行。輒煮米數斗。盡食之。途中可數日不食。時漳州有虎。獠甚。食人畜無算。太守必欲殪之。集兵士丁壯千人。持利械以往。虎負嵎眈眈。無敢近者。定因適以事至。衆望見之。噪曰。事濟矣。羣走告之。定因曰。殺虎易耳。願此虎非他。比須鐵鈹五十斤者。乃足。